

Script of Evening Gojri News Bulletin 18 September 2024 at 1700 Hrs

ایوننگ گو جری نیو ز بلیٹن مو رخہ 18 ستمبر 2024

یوہ آکا شوانی جموں بے عبدالرحمن تے محمد اکرم چودھری تیں خبر سُنو۔ پہلاں خاص خاص خبر۔

- * 1. جموں کشمیر مانہ اسمبلی انتخابات گا پہلا مرحلہ غے تحت ووٹینگ چل رہی ہے۔ جت پیشی 3 بجے تک مجموعی طور 50 فیصد تیں زیادہ پولینگ درج کی گئی ہے۔
- * 2. جموں کشمیر مانہ چل رہیا اسمبلی چناؤ غے دوران بہت ساری سیاسی جماعتاں گا لیڈر ریلی منعقد کر غے وٹراں نانہ اپنے در راغب کر رہیا ہیں۔ وزیر اعظم جناب نریندر مو دی پلک سرینگر مانہ اک ریلی سنگ خطاب کریں گا، جد کہ کانگریس لیڈر سچن پانٹ جموں مانہ میٹنگاں سنگ خطاب کریں گا۔
- * 3. حکومت نے پورا ملک مانہ اک ملک اک چناؤ غا وچار بارے قائم کی گئی اعلیٰ سطحی کمیٹی غی سفارشات نانہ منظور کر ليو ہے۔
- * 4. تے جموں کشمیر مانہ اسمبلی انتخابات گا تیجا تے آخری مرحلہ غے تحت 34 امید واراں نے کاغزات نامزدگی واپس لے لیا ہیں تے اس مرحلہ غے تحت 40 اسمبلی حلقاں واسطے 415 امید واراں انتخابی میدان مانہ رہ گیا ہیں۔

خبراں غی تفصیل نال پہلاں عبدالرحمن شاہین۔

Voting

جموں کشمیر قانون ساز اسمبلی انتخابات غا پہلا مرحلہ غے تحت 7 ضلعان مانہ پھلیا وا 24 اسمبلی حلقاں مانہ اج ووٹینگ چل رہی ہے۔ دوپہر 3 بجے تک مجموعی طور 50 عشاریہ 65 فیصد ووٹینگ درج کی گئی ہے۔ ووٹینگ اج سویرے سخت حفاظتی انتظامات سنگ 7 بجے شروع ہوئی۔

Voting Percentage

جموں کشمیر قانون ساز اسمبلی غا انتخابات غا پہلا مرحلہ غے تحت 24 اسمبلی حلقاں مانہ ووٹ کھلیا جا رہیا ہیں۔ جن وچوں جموں صوبہ غا 3 ضلعان غا 8 اسمبلی حلقاں مانہ دوپہر 3 بجے تک زبردست 64 عشاریہ 80 فیصد پولینگ درج کی گئی ہے۔ وادی چناب غا 3 ضلعان ڈوڈہ کشتواڑ تے رام بن مانہ ووٹینگ چل رہی ہے جت 7 لکھ 14 ہزار تیں متا اہل ووٹر ہیں جھپڑا اک دہائی تیں بعد منعقد ہون آلا اسمبلی چناواں گا پہلا مرحلہ غے تحت 64 امید واراں غی سیاسی قسمت غو فیصلو کریں گا۔ جموں کشمیر چیف الیکٹورل افسر غی طرفوں دتی گئی اطلاع غے مطابق کشتواڑ ضلع مانہ 3 اسمبلی حلقاں اندروال، کشتواڑ تے پاڈر ناگسینی مانہ مجموعی طور 70 عشاریہ 52 فیصد ووٹینگ درج کی گئی ہے۔ جت اندروال اسمبلی حلقہ مانہ زبردست 72 عشاریہ 20 فیصد لوکاں نے ووٹ کھلیا ہیں۔ کشتواڑ مانہ 67 عشاریہ 58 فیصد رائے دہندگان نے اپنا حق رائے دہندگی غو استعمال کیو ہے۔ تے نواں بنایا گیا اسمبلی حلقہ پاڈر ناگسینی مانہ 71 عشاریہ 8 فیصد لوکاں نے ووٹ کھلیا ہیں۔ مہارہ ضلع نامہ نگار سنگ بات چیت کرتاں واں ضلع چناؤ افسر کشتواڑ نے مزید جانکاری کجھ اس طرح کہیو۔۔۔ بانٹ۔ ڈوڈہ ضلع مانہ مجموعی طور

ر پولینگ فیصد 62 عشاریہ 4 فیصد رہی ہے۔ جت بہدرواہ اسمبلی حلقہ مانہہ 58 عشاریہ 32 فیصد پولینگ درج کی گئی ہے۔ ڈوڈہ اسمبلی حلقہ مانہہ 62 عشاریہ 13 فیصد پولینگ ہوئی ہے۔ تے ڈوڈہ مغربی اسمبلی حلقہ مانہہ 66 عشاریہ 75 فیصد پولینگ درج کی گئی ہے۔ رام بن ضلع مانہہ مجموعی طور 60 عشاریہ 19 فیصد پولینگ درج کی گئی ہے۔ جت رام بن اسمبلی حلقہ مانہہ 61 عشاریہ 38 فیصد حق رائے دہندگان نے اپنا حق رائے دہنگی غو استعمال کیو ہے جد کہ بانہال اسمبلی حلقہ مانہہ 59 فیصد پولینگ درج کی گئی ہے۔ ضلع رام بن مانہہ وی ووٹراں مانہہ ووٹ کھلن با رے کا فی جوش و خروش ہے۔ اس سلسلہ مانہہ اتوں اک ووٹر نے اپنا تاثرات کجھ اس طرح دسیو۔ بائٹ۔

PWD Voters

جسمانی طور معزور رائے دہندگان نے کشتواڑ مانہہ ان واسطے مخصوص پولینگ سٹیشن غی تعریف کی تے انہاں نانہہ دتی جا رہی ووٹاں با رے سہولیات نانہہ مد نظر رکھتاں واں بھارتی چناؤ کمیشن گو شکریو ادا کیو ہے۔ اس با رے انہاں نے کہیو۔۔۔ بائٹ۔

Polls Others

اسمبلی انتخابات غا پہلا مرحلہ مانہہ وادی چناب غے علا وہ جنوبی کشمیر غا 4 ضلعان بشمول اننت ناگ، پلوامہ، کلگام تے شوپیان شامل ہیں جن مانہہ 16 اسمبلی حلقہ ہیں۔ یا د رہ جے دفعہ 370 غی منسوخی تیں بعد اسمبلی انتخابات پہلی بار ہو رہیا ہیں۔ وادی کشمیر غا 16 اسمبلی حلقاں وچوں پہلگام اسمبلی حلقہ مانہہ سب تیں متی 47 عشاریہ 68 فیصد ووٹ کھلیا گیا ہیں۔ اس تیں بعد ڈی ایچ پورہ اسمبلی حلقہ مانہہ 43.66 فیصد ووٹ کھلیا گیا ہیں جد کہ 41.30 تے 41 فیصد ڈورو تے کو کرناگ مانہہ ووٹ پیا ہیں۔ اس طرح سب تیں کھٹ ترال مانہہ 26 عشاریہ 75 فیصد ووٹ پیا ہیں۔ اس سلسلہ مانہہ جنوبی کشمیر غا 16 حلقاں مانہہ 35 ہزار ما نیگرینٹ ووٹراں واسطے 24 پولینگ بوتھاں ور وی ووٹ چل رہیا ہیں۔ اس تیں علا وہ جموں مانہہ 19 اڈھم پور مانہہ اک تے دہلی 4 پولینگ سٹیشن قائم کیا گیا ہیں۔

Kashmiri Pandits

جموں کشمیر اسمبلی انتخابات 2024 غا اک حصہ غا طور ما نیگرینٹ کیمپاں مانہہ رہ رہیا کشمیری پنڈتاں نے روپ نگر جموں مانہہ قائم کیا گیا خصوصی پولینگ سٹیشن ور آغے اپنا ووٹ کھلیا۔ دہا یاں تیں اپنا کہروں اجڑیا واہ اس کشمیری پنڈت طبقہ نے اس موقعہ ور امید جتانی ہے جے اک پُر امن مستقبل آوے گو تے وے وادی کشمیر مانہہ با عزت طور واپس جائیں گا۔ اس موقعہ ور اپنا تاثرات دیتاں واں اک کشمیری ما نیگرینٹ ووٹر نے کجھ اس طرح کہیو۔۔۔ بائٹ۔

PM Appealed

جموں کشمیر اسمبلی چناؤ گو پہلو مرحلو اج شروع ہو گیو ہے۔ اس ضمن مانہہ وزیر اعظم نریندرمودی نے یوٹی گا ووٹراں ور زور دتو کہ وے بڑی تعداد مانہہ باہر آویں تے جمہوریت غا تہوار نانہہ مضبوط کریں۔ جناب مودی نے اپنا اک سماجی میڈیا پیغام مانہہ خاص طور ور نوجوان تے پہلی بار ووٹ دین آلاں نانہہ اپنا حق رائے دہی گو استعمال کرن غی ترغیب دتی۔

PM Srinagar

وزیر اعظم نریندر مودی غی طرفوں پلک شیر کشمیر پا رک سرینگر مانہ اک ریلی سنگ خطاب غا تناظر مانہ سرینگر مانہ اعلیٰ حفاظتی انتظامات کیا گیا ہیں واضع رہ جے چناؤ گا اعلان توں بعد کشمیر مانہ بی جے پی غی یاہ پہلی بڑی ریلی وے گی۔ بی جے پی نے کشمیر مانہ 19 امید وار اٹاریا ہیں۔ تے بہت ساری سیٹاں ور آزاد امید واراں غی حمایت کی جا رہی ہے۔ عہداراں غو کہنو ہے جے وزیر اعظم غی تقریر آلی جگہ ور تمام حفاظتی انتظامات کر لیا گیا ہیں۔ تے شہر اور اس غا مضافات مانہ اضافی پولیس و نیم فوجی دستہ تعینات کیا گیا ہیں۔ ریلی آلی جگہ ور 3 پالی حفاظت رکھی گئی ہے۔ تے اُت نزدیکی عمارتاں ور سٹاپ اور شارٹ شوٹر وی لا دتا گیا ہیں۔ بی جے پی لیڈراں غو کہنو ہے جے 20 ہزار تیں 30 ہزار لوک اس ریلی مانہ شرکت کر سکیں۔

Campaign

جموں کشمیر مانہ اسمبلی انتخابات گا بقایا 2 مرحلاں واسطے سیاسی جماعتاں غی مہم بڑی شدت پکڑ رہی ہے۔ بکھ بکھ سیاسی جماعتاں گا قائدین ووٹراں ناہہ اپنا در راغب کرن واسطے جلسہ، روڈ شو، بات چیت تے ریلیاں غو اہتمام کر رہیا ہیں۔ وزیر اعظم نریندر مودی کل شیر کشمیر پا رک سرینگر مانہ اک ریلی سنگ خطاب کرن واسطے آئیں گا۔ اس سلسلہ مانہ تگڑا حفاظتی انتظامات کیا گیا ہیں۔ تے چناؤ غا اعلان تیں بعد کشمیر مانہ یاہ بڑی ریلی وے گی۔ اس تیں علاوہ کانگریس پارٹی غی ابتدائی مہم چلان واسطے سچن پائلٹ وی جموں پُجیا ہیں تانجے چل رہیا چناؤ مانہ پارٹی امید واراں واسطے کم کیو جائے۔

یہ خبر تم آکاشوانی جموں تیں سُن رہیا ہیں خبراں غا باقی حصہ نال محمد اکرم چودھری۔

Cabinet Decisions

حکومت نے اک مُک اک چناؤ غا وچار بارے بنائی گئی اعلیٰ سطحی کمیٹی غی سفارشات ناہہ منظور کر ليو ہے تے اس طرح پورا مُک مانہ اک ہی وقت مانہ اکھٹا چناؤ بارے رستو صاف ہو گیو ہے۔ اج نویں دہلی مانہ ذرائع ابلاغ سنگ خطاب کرتاں واں اطلاعات و نشریات غا وزیر اشونی ویشنوؤ نے کہیو ہے جے سابقہ صدر جمہوریہ رام ناتھ کویند غی چیر مین شپ غے تحت بنائی گئی اس اعلیٰ سطحی کمیٹی نے سیاسی جماعتاں تے ماہرین سمیت شراکت داراں سنگ تفصیلاً تبادلہ خیال کیو۔ اُنہاں نے کہیو ہے جے اس ناہہ 2 مرحلاں مانہ عملایو جائے گو۔ پہلا مرحلہ مانہ لوک سبھا تے اسمبلی انتخابات اکھٹا ہی کروایا جائیں گا تے بلدیاتی اداراں گا چناؤ جس طرح کہ پنچائیتاں گا 10 دناں غے اندر اندر کروایا جائیں گا۔ وزیر موصوف نے دسیو ہے جے حکومت نے چندریان 4 مشن تے وینس مدار مشن ناہہ وی منظوری دے دتی ہے۔ تانجے سائینس و ٹیکنالوجی گا سیکٹر مانہ مُک ناہہ مضبوط کیو جائے۔ ربیع موسم 25/2024 واسطے کھاد غی نرکھان ور سبسڈی ناہہ وی منظوری دتی گئی ہے۔ وزیر موصوف نے مزید دسیو ہے جے 79 ہزار 1 سو 56 کروڑ روپیاں غی لاگت آلا پر دھان منتری جن جاتیہ اُت گرام ابھیان ناہہ وی منظوری دتی گئی ہے۔ اُنہاں نے کہیو ہے جے اس سکیم سنگ ٹرائیبل طبقاں غی سماجی و اقتصادی حالت بہتر وے گی۔ وزیر موصوف نے یوہ وی کہیو ہے

کا بینہ نے فضیلت حرکت پزیری، کھیٹ تے مزاحیہ بارے قومی مرکز غا قیام بارے وی منظوری دے دتی ہے۔

Withdrawal

جموں کشمیر اسمبلی چناؤ گا تیجا مرحلہ و اسطے پچھلے تہاڑے کاغزات نامزدگی واپس لین غے آخری تہاڑے 34 امید واراں نے اپنا ناں واپس لیا ہیں۔ جس نال بُن 4 سو 15 امید وار میدان مانہ رہ گیا ہیں۔ جت تیجا مرحلہ غے تحت 1 اکتوبر مانہ ووٹ کھلیا جائیں گا۔ جموں کشمیر یوٹی غا اعلیٰ چناوی افسر نے دسیو بے جے سب تیں متا کپواڑہ ضلع تیں 16 امید واراں نے اپنا ناں واپس لیا ہیں۔ جد کہ سانہ ضلع تیں کسے وی امید وار نے اپنا ناں واپس نہیں لیا ہے۔ قابل ذکر ہے جے تیجا مرحلہ واسطے کاغزات نامزدگی داخل کرن آلا امید واراں غی تعداد 4 سو 86 تھی جنہاں نے آخری تاریخ 12 ستمبر تک اپنا ناں داخل کرایا تھا۔ اس سلسلہ مانہ اسمبلی چناؤ مانہ حصول لین آلا امید واراں غی کل تعداد 8 سو 73 ہو گئی ہے۔ جھیڑا جے 90 اسمبلی حلقاں مانہ اپنی قسمت ازما رہیا ہیں جن مانہ 24 اسمبلی حلقہ مانہ پہلا مرحلہ غے تحت 219 امید وار جد کہ دوجا مرحلہ مانہ 26 اسمبلی حلقاں مانہ 239 امید وار تے تیجا اور آخری مرحلہ مانہ 40 اسمبلی حلقاں مانہ 4 سو 15 امید وار شامل ہیں۔

CS Assembly

چیف سیکریٹری اتل ڈلو نے پچھلے تہاڑے اک میٹنگ منعقد کر غے جموں تے سرینگر مانہ اسمبلی کمپلیکس غی توسیع کرن غے نال نال ایم ایل اے ہوسٹل تے چناؤ مکمل ہون تیں بعد اسمبلی غا کم مانہ بخوبی چلان واسطے عملہ غی دستیابی بارے اہم امور غو جائزہ لیا ہے۔ جناب ڈلو نے چل رہیا کم کاج مانہ تا ولین مکمل کرن تے معیار مانہ یقینی بنان غی ضرورت ور زور دتو۔ اس تیں علا وہ انہاں نے اہم بنیا دی ڈھانچہ غو وی جائزہ لیا۔ جن مانہ وائی فائی رابطو، فائر سیفٹی اقدامات، تے اسمبلی سیکریٹریٹ مانہ لفٹ غی سہولیات وغیرہ وی شامل ہیں۔ میٹنگ غے دوران گڈیاں غی خریداری بارے وی غور کیو گیو۔ اس سلسلہ مانہ موٹر گیرج غا سیکریٹری نے دسیو جے نویں گڈیاں غی خریداری غو حکم دتو گیو ہے تے انہاں گا ماڈل بارے جانکاری دتی گئی ہے۔ یاد رہ جے اس دوران وزرا بارے حفاظتی انتظامات تے بلٹ پروف گڈیاں غی دستیابی گو وی جائزہ لیا گیو ہے۔

اس غے نال ہی خبراں غو یوہ بلیٹن ختم ہوؤ۔